

5. Մ Է Ա Մ Բ Տ Ա Ն:

Թ. Գալէի և Բլուրի մէջ տեղն է Մամըտան, Թ. Գալէից ուղղակի 3 ժամ արևելեան հարաւային ուղղութեան վերայ, իսկ Բլուրից 1 ժամ արևմտեան հիւսիս 30 տնուոր Մէամըտանցի քուրդ են և կան 3—4 տուն գաղթական թուրքեր: Խաչուայ հարաւն է և որոյ քաւշանին խառնուած:

Այս գիւղի արտերն մեծաւ մասամբ անջրդի են:

Միւտիւր մի (գիւղախմբապետ) կը նստի այս գիւղն:

6. Ե Խ Ն Ի Թ Ա Փ Է (Բլուր):

Գիւղս գաշտիս կեդրոնէն սակաւ ինչ հարաւ կընկնի $\frac{5}{4}$ ժամ Խճուղիէն հիւսիս 7—8 գիւղերու կեդրոնը 76 տուն հայ բնակիչներ ունի, որք մեծաւ մասամբ ընդարձակ վարելահողեր ունին:

Թ. Գալէէ ի Գարա-Քիլիսէ գնալիք երկու ճանապարհին մին այս գիւղէն կանցնի, գրեթէ երկուքին ևս միջավայրն է:

Գիւղիս շրջականերու ջրոց առատ բղխմունքը առիթ տուած են գիւղացւոց ուռի ծառեր տնկել և գոմշեղէն սնուցանել: Տեղս քար չը լինելուն՝ գիւղացիք ճահճային վայրերու երեսից կոշտ կը հանեն, կը չորացնեն իբրև քար կը գործածեն տանց շինութեան համար:

Գիւղիս բնակիչք մտաւորապէս տգէտ և նախապաշարեալ վիճակ մը ունին՝ ընտանեկան կեանքն զբժընդակ է, նաև այս ջրի առատ վայրը խիստ անմաքուր կեանք կը վարեն, ուսումնարան չունին, մարագի նման եկեղեցի մի ունէին, քանդեցին, որ շինեն, այս վեց տարի կայ, երեսի վերայ մնացած է: